


**Sebija Izetbegović**  
Zastupnica u Skupštini Kantona Sarajevo

Bosna i Hercegovina  
Federacija Bosne i Hercegovine  
Kanton Sarajevo  
Skupština Kantona Sarajevo



n/r Predsjedavajućeg Skupštine Kantona Sarajevo

**Uputiti:** Ministarstvu zdravstva Kantona Sarajevo i Kliničkom centru Univerziteta u Sarajevu (KCUS)

**PREDMET: Zaduženje i nabavka medicinske opreme za KCUS putem međunarodnog sporazuma**

Poštovani,

U skladu sa Poslovníkom Skupštine Kantona Sarajevo, a imajući u vidu informacije o potpisanom **Protokolu o razumijevanju i saradnji između Vlade Federacije BiH i China Sinopharm International Corporation**, kojim se uspostavlja okvir za zaduženje u iznosu od približno 100 miliona eura, od čega je oko 52 miliona eura planirano za potrebe KCUS-a, upućujem sljedeća zastupnička pitanja.

Radi se o izuzetno značajnom finansijskom i sistemskom pitanju koje direktno utiče na zdravstveni sistem, javne finansije i sigurnost pacijenata, te zahtijeva punu transparentnost i jasno utvrđenu odgovornost.

### **I. NADLEŽNOST I DONOŠENJE ODLUKA**

Molim da dostavite:

- Ko donosi zdravstvene politike i strateške odluke koje se odnose na KCUS, uključujući odluke o višemilionskom zaduženju za nabavku medicinske opreme.
- Na osnovu kojeg pravnog akta i koje procedure je odlučeno da se KCUS uključi u predmetni aranžman zaduženja.
- Da li su Ministarstvo zdravstva Kantona Sarajevo i organi upravljanja KCUS-a dali saglasnost na ovakav model finansiranja i nabavke.

### **II. POSTUPAK NABAVKE I ZAKON O JAVNIM NABAVKAMA**

Molim da jasno odgovorite:

- Na koji način će se vršiti nabavka medicinske opreme u okviru ovog aranžmana.
- Da li će se primjenjivati Zakon o javnim nabavkama Bosne i Hercegovine.
- Ukoliko neće, na osnovu kojeg pravnog osnova se planira odstupiti od zakonskih procedura javnih nabavki.
- Da li je tačna informacija da će se kompletna nabavka povjeriti jednoj kompaniji, bez provođenja međunarodnog tendera.

### **III. IZBOR DOBAVLJAČA I KRITERIJI**

Molim da dostavite:

- Na osnovu kojih kriterija je izabrana kompanija China Sinopharm International Corporation kao partner u ovom projektu.
- Da li je vršena analiza tržišta i uporedna evaluacija drugih potencijalnih dobavljača medicinske opreme.
- Da li su provedene nezavisne stručne procjene opravdanosti izbora ovog modela nabavke.

#### IV. KVALITET OPREME I SIGURNOST PACIJENATA

Molim da jasno odgovorite:

- Na osnovu kojih standarda i certifikata je utvrđeno da medicinska oprema koja će biti nabavljena zadovoljava sve međunarodne i domaće zdravstvene standarde.
- Da li je izvršena procjena usklađenosti opreme sa postojećim sistemima i potrebama KCUS-a.
- Ko garantuje kvalitet, sigurnost i dugoročnu održivost opreme koja će biti nabavljena.

#### V. FINANSIJSKI ASPEKT I ZADUŽENJE

Molim da dostavite:

- Detaljne uslove zaduženja (rok otplate, kamatna stopa, grace period).
- Ukupan finansijski teret ovog aranžmana po budžet Federacije BiH i zdravstveni sistem.
- Da li je rađena analiza isplativosti i dugoročnih efekata ovog zaduženja.

#### ZAKLJUČAK

U ovom slučaju ne radi se samo o nabavci opreme, već o modelu upravljanja javnim sredstvima i zdravstvenim sistemom.

Zaduženje u iznosu od više desetina miliona eura, uz mogućnost zaobilaznja zakonskih procedura javnih nabavki i koncentraciju nabavke kod jednog dobavljača, otvara ozbiljna pitanja transparentnosti, zakonitosti i odgovornosti.

Dodatno zabrinjava činjenica da se ovakav model pokušava opravdati međunarodnim sporazumom, što ne može i ne smije biti osnov za izbjegavanje važećih zakona Bosne i Hercegovine.

Očekujem da nadležne institucije dostave jasan, precizan i dokumentovan odgovor, sa svim relevantnim aktima, analizama i odlukama koje su dovele do ovog aranžmana.

**S poštovanjem,**

Sebija Izetbegović  
Zastupnica u Skupštini Kantona Sarajevo

